

**BERITA ONLINE
SINAR HARIAN
TARIKH : 26 OKTOBER 2021 (SELASA)**



MVP bakal kilang pertama hasilkan vaksin manusia halal di dunia

MUHAMMAD YUSAINY MOHAMAD YUNUS | | 26 Oktober 2021



Rashidah (dua dari kiri) menunjukkan proses pembuatan vaksin di Malaysian Vaccine and Pharmaceutical Sdn Bhd, Puchong pada Selasa.

PUCHONG - [DIKEMASKINI] Malaysian Vaccine and Pharmaceutical (MVP) bakal menjadi kilang pertama menghasilkan vaksin manusia yang halal di dunia menjelang tahun 2024.

Pengarah Eksekutif MVP, Rashidah Ibrahim berkata, tempoh jangkaan tersebut lebih awal daripada yang diharapkan oleh kerajaan.

Tambahnya, MVP menjangkakan mampu menghasilkan sebanyak 10 juta dos menjelang tiga tahun.

“Kita mempunyai bangunan dua lot kilang. Dengan teknologi sama, dalam tempoh kurang dari tiga tahun kita mampu membekalkan vaksin manusia.

“Kami tiada masalah kerana kebanyakan pekerja di sini mempunyai kepakaran teknikal yang sangat tinggi,” katanya pada Majlis Pertukaran Dokumen MVP dan St Petersburg Scientific Research Institutes For Vaccine, di sini pada Selasa.

Hadir sama, Menteri Sains, Teknologi dan Inovasi (MOSTI), Datuk Seri Dr Adham Baba; Ketua Setiausaha MOSTI, Datuk Zainal Abidin Abu Hasan; Ahli Lembaga Pengarah MVP dan Bekas Ketua Pengarah Kesihatan Kementerian Pertahanan Malaysia, Leftenan Jeneral Datuk Panglima Dr Amin Muslan.



Dr Adham ketika mengadakan lawatan kerja di Malaysian Vaccine and Pharmaceutical Sdn Bhd, Puchong pada Selasa.

Dalam pada itu, Rashidah berkata, St Petersburg melabur sebanyak AS\$50 juta bagi menampung fasiliti dan mesin untuk menghasilkan vaksin.

Menurutnya, vaksin yang dihasilkan akan dikembangkan bukan sahaja untuk kegunaan tempatan tetapi di luar negara dengan kerjasama Kementerian Kesihatan Malaysia (KKM).